



剃頭

前幾日對剃頭店個門前過，看著一個兩、三歲個細人仔在佢姆個膝頭頂奮奮碾，噉到噉噉殺天，搨斯搨毋核，兩子哀像打戰樣，搨到滿身大汗。唉！又係一個驚剃頭個細人仔。

頭擺不管細佬仔抑係細妹仔，係愛剃頭就愛去剃頭店剃。佢姆愛伶俐，看毋慣細人仔鬚頭髮披，無幾久、無幾久就渡佢去剃頭。佢屋下隔壁就係剃頭店，大家盡熟事，佢姆渡佢落去，交代好愛剪幾短，就轉屋下做事咧。佢一儕坐上凳頂，同好剃頭帕，看著師傅擎等剪刀對等佢，就開始嘩嘩掣咧，忍到毛剪好，師傅又擎等剃頭刀愛刮佢後背個毛腳，佢驚到頸根緊鉤、屎脬在凳頂扭上扭下，師傅一頭刮、一頭喊佢毋好停動，佢牙齒齧等、拳頭麻扼等，像經過幾下世紀恁久正剃好。剃頭實在得人驚！

到較大兜，佢毋驚師傅個剪刀、剃頭刀，驚個係師傅該張嘴。因為暢(tiong)熟事咧，剃頭個木蘭伯當好(hau)鐘鼓佢，看著佢個毛恁多，成時會笑佢講：「你個頭那毛淋尿係無，仰會生到恁靚恁多？」下把仔又會講：「營養毋好專門搨到頭那毛去，愛食較(hau)高兜正有影哪！毋好像矮麻車矮佢仔。」脣頭剃頭個人聽著就笑起來，佢個面皮薄，分人恁樣準笑話講，一肚屎懊躁。又一擺，也係因為佢個頭那毛賁，師傅個剪刀毋堵好一蕩溜，嘎撻佢個耳空剪隻空，轉去佢姆毋單淨無安慰佢，還罵佢講：「毋恬恬坐等分人剃哪！耳空無分人剪忒就已好咧。」佢還較感覺委屈。剃頭！剃頭！佢惱剃頭！

小學四年生個時節，班項轉來一個新同學，拚等長長個毛辮，該時莊下頭無細人仔留長毛，惱剃頭個佢看著，轉去撻佢姆要求也愛留長頭那毛，佢姆黏皮講：「逐日愛撻你梳毛、縳毛，佢正無恁大神氣哪！頭那毛恁長，洗乜毋方便，係分人還著蝨麻啊，該斯愛剃光頭正得！」留長頭那毛個夢想又滅忒咧。到了初中，規定頭那毛愛剪到耳砵頂高，所以差毋多逐隻月就愛剃頭，佢撻剃頭個戰爭一直到十七、八歲正結束。

前幾日佢看著該隻噉等毋肯剃頭個細人仔，當想行前去搨起來講：「無愛剃，無愛剃！慁佢來去走，慁佢來去走！」斯像佢頭擺想愛逃開該剃頭店樣。

作者：張美容

☆詞彙學習☆

【奮奮碾】bin' bin' zan'：用力掙扎。

【噉噉殺天】ve vong sad tien'：大聲哭喊

【搨到】med do'：弄到。

【鬚頭髮披】nung teu gi' pai'：披頭散髮。

【嘩嘩掣】bid bid chad：不停發抖。

【鐘鼓】zhung' gu'：消遣、奚落。

【矮佢仔】ai' dud dud er：矮嘟嘟的。

【懊躁】au' cau'：懊惱。

【蕩溜】tong' tiu'：打滑。

【拼毛辮】pin' mo bien'：編辮子。

☆文法學習☆

【該斯愛剃光頭正得】gai sii oi' ti' gong' teu zhang' ded：那就要理光頭了。「正得」是表示肯定的語助詞。

例1：有好食斯懶停動，恁懶尸正得。(有可以吃還懶得動，真是懶惰。)

例2：分人嫌啊著就闊，恁小氣正得。(一被人嫌就生氣，真是小氣。)